

Gia examinà avant set onns

La regenza grischuna na vesa nagina necessitad dad examinar ils causals penals

■ **(anr/ac) La regenza grischuna è bain pronta da schlargiar il catalog da las multas disciplinaras, ulteriuras pretensiuns dal deputà Reto Cramerì (pcd Alvagni) na vesa ella dentant betg per realisablas.** En ina incumbensa inoltrada durant la sessiun dal 10 d'october da l'onn passà ha il deputà *Reto Cramerì* (pcd, Alvagni) tranter auter pretendì da la regenza dad examinar las proceduras penals da surpassaments uschè lunsch ch'ellas na pertutgan betg la lescha penala federala. Cun ina tala examinaziun vul il deputà cuntanscher ch'els custs da procedura vegnian sbasads. Per exempel cun schlargiar il catalog da delicts da las multas disciplinaras, dad installar per delicts pitschens in sistem d'admoniziun e dad introducir tar quels delicts da piculezzas custs da procedura che na surpassan betg la sanziun sco tala. Il deputà vul ch'il chantun examineschia en quel senn l'entir causal penal grischun. E gist quella examinaziun entira na vesa la regenza grischuna betg per necessaria, sco ella scriva en la resposta. La regenza fa attent a la revisiun da la procedura penala federala da l'onn 2011 ch'haja gì per consequenza ch'els causals penals grischuns sajan vegnids examinads vers la necessitad e funcziunalitad. La regenza na vesa momentan nagins motifs per in'ulteriura examinaziun. Ella prenda era posiziun vers ils differents puncts pledentads da l'incumbensa Cramerì. Quai che pertu-

tga schlargiar il catalog da delicts da las multas disciplinaras ha la regenza visà a la revisiun da la lescha federala da las multas disciplinaras che gaja en vigor cun l'ordinaziun probablamain l'entschatta schaner 2020. Ina legislaziun accompagnanta ha il cussegl grond acceptà a chaschun da la sessiun d'avust 2018. Sin palancà chantunal saja la regenza adina pronta da schlargiar il catalog da las multas disciplinaras là nua ch'i saja pussaivel, scriva la regenza.

Admoniziun sulet tar il dretg penal per juvenils

Admoniziuns sco sanziun penala enconuschia sulet il dretg penal federal per juvenils, scriva la regenza en la resposta al deputà Cramerì. Il dretg penal da creschids n'enconuschia betg quella sanziun ed ina midada da quella sistematica entaifer il spazi d'agir penal dal chantun valtescha la regenza per ester nà da la sistematica e grev dad applitgar per cuntanscher in'egualitad giuridica. La fin finala fa la regenza gri-

schuna attent als custs da procedura da la Procura publica e da las dretgiras che sa drizzian als custs effectivs dal stadi effectuads da delicts e delinquents. La regenza na vesa betg il senn da sa drizzar cun els custs da la procedura a l'altezza da las sanziuns. Ella fa attent ch'autras proceduras statalas, sco per exempel lubientschas da construcziun ed auter, sa drizzian medemamain als custs effectivs e la regenza na vesa betg in senn da midar sistematica tar las proceduras penals.



Sulet tar las multas disciplinaras po la regenza suandar las pretensiuns da l'incumbensa dal deputà Reto Cramerì.